



UNIVERSITÄTS-
BIBLIOTHEK
PADERBORN

Universitätsbibliothek Paderborn

Instructio practica ...

Svccinctam Doctrinarum Asceticarum Svmmam Comprehendens - Quam
ad majorem omnium in Ascési proficere cupientium utilitatem ac
subsídium

Lohner, Tobias

Dilingæ, 1685

§. 2. De Mundo.

[urn:nbn:de:hbz:466:1-48214](https://nbn-resolving.org/urn:nbn:de:hbz:466:1-48214)

§. II.

De Mundo.

I. Est, prout h̄c accipitur, vitiosa & misera humanae naturae conditio ex peccato originali contracta; de quo quatuor Ascetæ sunt scienda.

II. Primum est, ut firmiter sibi, aliisque persuadeat id, quod unanimiter SS. Patres & Ascetæ docent, & cum illis S. Cyprianus dicens: Mundi Amor & DEI pariter in uno corde habitare non possunt, quemadmodum oculi pariter cælum & terram nequaquam conspiciunt. Quod idem confirmans S. Hieronymus, difficile, ait, imò impossibile est, ut præsentibus quis & futuris fruatur bonis, ut h̄c ventrem, & ibi mentem impleat: ut de delicijs transcat ad delicias: ut in utroque sæculo primus sit, & in cælo ac in terra appareat gloriosus.

III. Alterum est, ut certò sibi persuadeat, non posse se Christi discipulum esse, nisi & mundum odisse, & ab ipso odio haberi velit; sic enim ipse Christus prædixit: Si de Mundo fuissetis, Mundus, quod suum erat, diligeret. Quia verò de Mundo non estis, sed ego elegi vos, propterea odit vos Mundus.

IV. Tertium est, ut sciat, quid sit relinquere Mundum, nempe relinquere ea, quæ quærunt Mundani, puta voluptates, divitias, & honores, & similia. Deinde relinquere modum imperfectum, quo Mundani opera ad cultum DEI & Proximorum spectantia peragunt. Et tandem relinquere finem, propter quem Mundani plerumque sua opera peragunt, scilicet proprium commodum & amorem. Hoc modo

do enim impletur consilium Apostoli suadentis, ut Mundo tanquam non utentes utamur.

V. Quartum est, ut studeat non quocunque modo recedere à Mundo, sed ita, ut eodem, aut majori fervore, quo priùs Mundo serviebat, deinceps DEO serviat, juxta consilium S. Augustini dicentis: Amorem vestrum purgate, & quales impetus habebatis ad Mundum, tales habeatis ad Artificem Mundi. Quod ipsum etiam suadens S. Chrysologus, vivamus, inquit, DEO paululum, qui sæculo vivimus totum: dedimus corpori annum, demus animæ paucos dies. Tempus est, ut aliquando tibi, domuique tuæ provideas.

§. III.

De Muliere.

I. Est homo ad liberos passivè procreandos natus; de qua Sequentia nosse, & observare debet Asceta.

II. Primum est, ut quantum fieri potest, omnem cum hoc sexu consuetudinem & familiaritatem penitus abscindat, eumque in finem, memorandæ S. Hieronymi sententiam ob oculos semper habeat. Quid tibi necesse est in ea versari domo, in qua necesse habeas quotidie, aut perire, aut vincere? quis unquam apud viperam securus somnum capit? quæ enim si non percutiat, certè sollicitat.

III. Alterum est, ut, ubi caritas aut necessitas ejusmodi conversationem aut cohabitationem suaverit, cum magna cautela eam suscipiat; nimium enim præceps est, qui transire contendit, ubi alium conspexit cecidisse.